



Մ ՈՒՐՐ Զ ԱԿՈՐ

ԱՌԱՋՆՈՐԴԱՆԻՍՏ ՄԱՅՐ ԵՒ ԿԵՂԵՅԻ



Երրորդ Օր Սուրբ Ծննդեան

08 ՅՈՒՆԻՍԻՐ 2017

Կիրակնօրեայ Ընթերցումներ	Էջ 1
Ծնունդը՝ Լրումն ժամանակի	Էջ 2
Ծանուցումներ	Էջ 4

**ԸՆԹԵՐՑՈՒՄ
ՊՕՂՈՍ ԱՌԱՔԵԱԼԻ
ԵՐԱՅԵՑԻՆԵՐՈՒՆ
ԳՐԱԾ ՆԱՄԱԿԷՆ
1.1-12**

Անցեալին բազմաթիւ անգամներ եւ բազմաթիւ կերպերով Աստուած մեր հայրերուն խօսեցաւ մարգարէներուն միջոցաւ, իսկ այս վերջին օրերուն մեզի խօսեցաւ իր Որդիին միջոցաւ:

Անիկա շատ աւելի բարձր է հրեշտակներէն...

Աստուած զինք ամէն բանի ժառանգորդ կարգեց եւ անոր միջոցաւ էր որ տիեզերքը ստեղծեց: Որդին, Հօրը փառքին լոյսը եւ անոր էութեան ճշգրիտ պատկերը,

որ իր խօսքին զօրութեամբ տիեզերքը կը պահէ, իր անձով մեր մեղքերը սրբելէ ետք երկինքի մէջ նստաւ Աստուծոյ՝ Գերագոյն Զօրութեան աջ կողմը:

Անիկա շատ աւելի բարձր է հրեշտակներէն, ինչպէս Աստուծոյ իրեն տրուած անունը ցոյց կու տայ. որովհետեւ ո՞ր մէկ հրեշտակին երբեւիցէ Աստուած ըսաւ. «Դուն իմ որդիս ես, այսօ՛ր քեզ ծնայ»: Կամ որո՞ւ ըսաւ. «Ես անոր հայր պիտի ըլլամ եւ անիկա ինծի որդի»: Դարձեալ, երբ իր անդրանիկ Որդին

աշխարհ կը զրկէր, ըսաւ. «Աստուծոյ բոլոր հրեշտակները թող պաշտեն զայն»:

Աստուած իր հրեշտակներուն մասին խօսած ատեն կ'ըսէ.

«Աստուած իր հրեշտակները ստեղծեց որպէս պատգամաւոր հոգիներ, եւ իր պաշտօնեաները՝ կրակի բոցի պէս»:

Մինչդեռ Որդիին կ'ըսէ.

«Քու աթոռդ, ո՛վ Աստուած, յաւիտենական է.

արդարութեամբ կ'իշխես թագաւորութեանդ վրայ:

Արդարութիւնը կը սիրես եւ անիրաւութիւնը կ'ատես:

Ահա թէ ինչու, ո՛վ Աստուած, քու Աստուածդ ուրախութեան իւզով օծեց քեզ քու ընկերներէդ աւելի»:

Դարձեալ, ուրիշ տեղ մը Որդիին կ'ըսէ.

«Դուն, ո՛վ Տէր, սկիզբէն ստեղծեցիր երկիրը,

եւ երկինքը քու ձեռագործդ է:

Անոնք պիտի կորսուին.

բայց դուն կաս եւ կը մնաս:

Անոնք հագուստի պէս պիտի մաշին.

վերարկուի մը պէս պիտի ծալլես զանոնք

եւ հագուստի պէս փոխես:

Բայց դուն միշտ նոյնն ես եւ քու տարիներդ վերջ պիտի չունենան»:

Անոնք պիտի կորսուին. բայց դուն կաս եւ կը մնաս:

ՅԻՍՈՒՍ ՔՐԻՍՏՈՍԻ ԱԻԵՏԱՐԱՆԷՆ
ԸՍՏ ՄԱՏԹԵՈՍԻ
2.13-23

Երբ մոգերը Բեթլեհէմէն հեռացան, Տիրոջ հրեշտակը Յովսէփի երեւցաւ երազին մէջ եւ ըսաւ. «Ե՛լ, ա՛ռ մանուկն ու իր մայրը եւ փախիր Եգիպտոս. հո՛ն մնա մինչեւ որ կրկին քեզի յայտնուիմ, որովհետեւ Հերովդէս թագաւոր մանուկը կը փնտռէ՝ զայն սպաննելու համար»: Յովսէփ արթնցաւ, գիշերով առաւ մանուկն ու մայրը եւ գնաց Եգիպտոս, ուր մնաց մինչեւ Հերովդէսի մահը: Այս ձեւով իրականացաւ Տիրոջ խօսքը, Ովսիա մարգարէի բերնով ըսուած. «Եգիպտոսէն կանչեցի իմ որդիս»:

Իսկ Հերովդէս երբ տեսաւ որ մոգերը զինք խաղի բերին, սաստիկ զայրացաւ եւ մարդիկ ղրկեց որպէսզի սպաննեն Բեթլեհէմի մէջ եւ անոր շրջակայքը գտնուող բոլոր երեխաները, որոնք երկու տարեկան եւ կամ աւելի փոքր էին, նկատի առնելով Յիսուսի ծննդեան ժամանակը, որ ստուգած էր մոգերէն: Այսպիսով իրականացաւ Երեմիա մարգարէին խօսքը, որ կ'ըսէ.

«Գոյժ մը լսուեցաւ Ռամայի մէջ,
հեծեծանք եւ լացուկոծ դառնագին.

Ռաքէլ իր զաւակներուն համար կու
լար

եւ մխիթարուիլ չէր ուզեր,
քանի այլեւս անոնք չկային»:

Հերովդէսի մահէն ետք ահա Տիրոջ հրեշտակը Եգիպտոսի մէջ Յովսէփի երեւցաւ երազին մէջ եւ ըսաւ. «Ե՛լ, ա՛ռ մանուկն ու իր մայրը եւ վերադարձիր Իսրայէլի երկիրը, որովհետեւ մանուկը սպաննել ուզողները մահացան»: Յովսէփ ելաւ, առաւ մանուկն ու իր մայրը եւ վերադարձաւ Իսրայէլի երկիրը: Սակայն երբ լսեց որ Հերովդէսի տեղ անոր զաւակը՝ Արքեղայոս թագաւորած է Հրէաստանի վրայ, հոն երթալու վախցաւ: Փոխարէնը,

երազի մը մէջ իրեն հրամայուածին համաձան գնաց Գալիլիայի կողմերը եւ բնակեցաւ Նազարէթ քաղաքին մէջ: Եւ այսպէս իրականացաւ մարգարէներուն խօսքը, թէ Նազովրեցի պիտի կոչուի:



ԾՆՈՒՆԴԸ
ԼՐՈՒՄՆ ԺԱՄԱՆԱԿԻ

«Եթէ ես աշխարհ եկած չլլայի...» (ՅՅ 15.22)

Յովհաննէսի Աւետարանին մէջ կը կարդանք վերոյիշեալ բառերը, որոնք մեր Տիրոջ՝ Յիսուս Քրիստոսի շրթներէն արտասանուած բառերն են եւ մեզ կը հրաւիրեն մտածելու, թէ՛ ի՞նչ կը պատահէր, եթէ Ան չգար աշխարհ: Ի՞նչ կը պատահէր եթէ Ան չծնէր Բեթլեհէմի մէջ: Ի՞նչ կը պատահէր եթէ Ան չպատգամէր ու չփոխանցէր աստուածային ճշմարիտ խօսքերը, եթէ Ան չարտասանէր Աստուծոյ կամքը բացատրող «Երանիները», եթէ Ան չքալէր ջուրի վրայ: Ի՞նչ կը պատահէր եթէ Ան չբժշկէր հիւանդը, կոյրին տեսողութիւն չտար, խուլին՝ լսողութիւն, համրին՝ խօսելու եւ անդամալոյծին՝ քալելու կարողութիւն: Ի՞նչ կը պատահէր եթէ Ան մեռելին յարուցէր չտար, եթէ Ան չխաչուէր, չթաղուէր եւ յարուցէր չտար, եթէ Ան չխաչուէր, չթաղուէր եւ չապրէր աշխարհ՝ իր ճշմարիտ վարդապետութիւնը քարոզելու: Ի՞նչ կը պատահէր, ո՞ւր կ'ըլլայինք մենք եւ ի՞նչպիսի աշխարհ կ'ունենայինք: Արդեօք տարբե՞ր կ'ըլլար մարդկութիւնը, եթէ Ան աշխարհ չգար:

Հին Կտակարանի մարգարէները կը խօսին

սպասուեալ Մեսիայի մը կամ Փրկիչի մը ծնունդի մասին. ամենէն վառ օրինակներէն մէկն է Միքիա մարգարէի բացատրութիւնը. «Իսկ դո՛ւն, ո՛վ Բեթղեհէ՛մ, Եփրաթա, թէպէտ Յուդայի հազարաւորներուն մէջ փոքր ես, քեզմէ՛ պիտի ելլէ Ինծի համար ա՛ն՝ որ Իսրայէլի վրայ կառավարիչ պիտի ըլլայ. Անոր ծագումը վաղեմի, յաւիտենական օրերէն է» (Մք 5.2): Այո՛, եթէ Քրիստոս չգար՝ Աստուծոյ խոստումը չէր իրականանար, եթէ Քրիստոս չգար՝ աշխարհը կը շարունակէր մնալ խաւարի մէջ: Եթէ Քրիստոս չգար չէինք գիտնար, որ «Աստուած սէր է»: Եթէ Քրիստոս չգար՝ ոչ մէկ տարածութիւն չէր ըլլար մեղքի եւ մարդու միջեւ: Եթէ Քրիստոս չգար՝ չէինք ունենար «Աւետարան»՝ հաւատալու համար: Եթէ Քրիստոս չգար, ո՛չ ծնունդ եւ ո՛չ յարութիւն կ'ըլլար: Եթէ Քրիստոս չգար՝ յոյս չէինք ունենար գերեզմանէն այն կողմ: Եւ վերջապէս, եթէ Քրիստոս չգար՝ կորստեան մատնուած կը մնայինք եւ չէինք ունենար Փրկիչ մը՝ մեզ մեղքերէն ազատագրող:

Կ'արժէ այստեղ լսել հրեշտակի բարի լուրը՝ «Այսօր... Դաւիթի քաղաքին մէջ ձեր Փրկիչը ծնաւ... որ Օծեալ Տէրն է: Հետեւեալը ապացոյց ըլլայ ձեզի.- Հոն մանուկ մը պիտի գտնէք՝ խանձարուրով փաթթուած եւ մսուրի մէջ դրուած» (Ղկ 2.11-12): Այո՛, Յիսուսն Ինքը ըսաւ «Եթէ աշխարհ եկած չըլլայի...», բայց փառք Աստուծոյ, որ Ան եկաւ...: Պօղոս առաքեալը գեղեցորէն բնութագրած է ըսելով. «Բայց հիմա յարմար ժամանակը հասած համարելով՝ Աստուած աշխարհ զրկեց իր Որդին» որ կնոջմէ մը ծնաւ եւ Օրէնքին տակ ապրեցաւ» (Գղ 4.4):

Այսօր կը տօնենք Ծնունդը Մեծ Բարերարին. Ան, որ ծնաւ աղքատիկ մսուրի մը մէջ, յարգէ անկողինին մէջ, խոտէ վերմակի տակ: Աստուած ժամանակը հասած համարելով՝ զրկեց իր Միածին Որդին եւ իր խոստումը կատարեց: Երբ աշխարհը խաւարի եւ չարութեան մէջ ընկղմած էր, մարդը հեռացած էր Աստուծմէ, աստուածային ճշմարիտ պատկերը խաթարուած էր իր մէջ, չէր ճանչնար սիրոյ Աստուածը, որ իր կեանքի Աղբիւրն էր եւ իր սրտի Կրակը: Մէկ խօսքով՝ ո՛չ կանուխ էր եւ ո՛չ՝ ուշ. Աստուած կը պատրաստէր աշխարհը, Ան երբէք չմոռցաւ մարդը, չլքեց զայն. ընդհակառակը՝ ճիշտ ժամանակի լրումին ուղարկեց իր Միածին Որդին, որպէսզի աշխարհը վերածուի սիրոյ

Աստուծոյ բնակարանին: Այո՛, Յիսուս մանուկն էր Փրկիչը աշխարհի: Դժբախտաբար, Անոր ծնունդի ժամանակ աշխարհը տեղ չուներ Իրեն համար. Ան ծնաւ անշուք «ախոռի» մէջ: Ան դարձաւ կատարեալ մարդ՝ ամբողջապէս, որպէսզի մարդը աստուածանայ: Ան իր աստուածային բարձրութեն խոնարհեցաւ, որպէսզի մարդը բարձրանայ եւ մօտենայ Աստուծոյ: Ահաւասիկ՝ ծնունդը Հրաշքի. Հրաշք մը, որ երեսուներեք տարիներ քալեց, պատգամեց, բժշկեց եւ հրաշագործեց: Ան եղաւ մանուկներու ճշմարիտ բարեկամը: Ան եղաւ աշխարհի թշուառներու, վշտակիրներու, խեղճերու եւ հիւանդներու օգնականն ու մխիթարիչը: Ան, ի վերջոյ, եղաւ մեղաւորներու եւ արհամարհուածներու ճշմարիտ կարեկիցը:

Հարց տանք մեք մեզ, թէ այսօր որքանո՞վ ուրախ է մարդը, որ Աստուծոյ Որդին՝ մեր բոլորին Փրկիչը աշխարհ եկաւ: Այսօրուան աշխարհին մէջ, Ծննդեան այս օրերուն նուէրներ կը փոխանակենք իրարու եւ ուրախութեամբ կը բանանք այդ նուէրները: Որքանո՞վ մարդը կ'անդրադառնայ, որ Աստուած ամենաթանկ նուէրը տուաւ մեզի, ո՛չ թէ փայլուն թուղթի մը մէջ եւ գոյնզգոյն ժապաւէններով զարդարուած, այլ՝ պարզ խանձարուրի մէջ փաթթուած եւ անշուք ախոռի մէջ ծնած Փրկիչ մը. այդ նուէրը քուկդ է, իմս է, մեր բոլորինն է: Այդ նուէրը այնտեղ է՝ մեր սեփականութիւնն է. անձնապէս պէտք է երթանք եւ վերցնենք: Պատրա՞ստ ենք երթալու, այդ ճամբորդութիւնը կատարելու, Ծնածը տեսնելու, Փրկիչը գրկելու եւ փոխադրելու մեր սրտերուն եւ հոգիներուն մէջ, դարձնելու հաւատքի եւ սիրոյ մարմնացումը:

Ժամանակը իր լրումին հասած է. այսօրուան աշխարհը որքա՞ն կարիքը ունի խաղաղութեան եւ արդարութեան Իշխանին եւ սիրող Փրկիչին: Աստուած ժամանակը հասած համարելով՝ իր Միածին Որդին միջոցով եկաւ այս անարդար աշխարհը արդար ու խաղաղ աշխարհի վերածելու, իր ամէնէն թանկ կեանքը տուաւ, որպէսզի մարդը խաւարէն դէպի Լոյս, մահէն դէպի Կեանք առաջնորդուի: Երեսուներեք տարիներ յետոյ իր տնօրինական կեանքը լրումին հասցուց եւ իր առաքելութիւնն աւարտեց ու դարձեալ երկինք բարձրացաւ եւ նստեցաւ իր Հօր աջ կողմը: Ի՞նչ փոխուեցաւ այս աշխարհին մէջ: - Ոչի՛նչ.

մարդը մնաց մեղքի նոյն տիրոջ մէջ, աշխարհը մնաց անարդար, չարը շարունակեց տիրապետել, կեղծիքն ու սուտը խորացան: Դժբախտաբար, մարդը մնաց նոյն անհնազանդ արարածը, անտեսեց աստուածային պատուիրանները, շարունակեց սպաննել, գողնալ եւ ուրիշին ունեցուածքը յափշտակել. վկայ պատմութիւնը մեր ժողովուրդի: Հայոց ցեղասպանութենէն 100 տարի յետոյ ոչինչ փոխուած է. մեր թշնամին տակաւին կ'ուրանայ իր կատարած մեծագոյն մեղքը: Աշխարհը կը մնայ լուռ եւ անարդար: Ականատես եւ ականջալուր ենք այսօր, թէ ինչպէս մարդիկ կը շարունակեն չարին հնազանդիլ, չարութեամբ, ատելութեամբ ու վրէժխնդրութեամբ վերաբերուիլ իրենց նմանին հետ, սպաննել ու կոտորել:

Այսօր, մարդկութիւնը մէկ ընելիք ունի՝ իր հայեացքը դարձնել դէպի Բեթղեհեմ՝ արդարութիւնն ու խաղաղութիւնը վերահաստատելու, իր հայեացքը դարձնել դէպի Գողգոթա՝ լսելու Փրկիչին ձայնը՝ «Ես յաղթեցի աշխարհին»:

Իր հայեացքը դարձնել դէպի Ս. Յարութեան տաճար, յարուցեալ Քրիստոսի հետ մաքրուելու եւ վերածնելու:

Ահա՛ պատգամը հրաշափառ Ս. Ծննդեան:
Ահա՛ երաշխիքը մեր փրկութեան:
Ահա՛ ճանապարհը յաւերժութեան:

* *
*

Ս. Ծննդեան տօնին առիթով, սիրոյ իմ սրտագին ողջոյնս կ'ողողեմ ձեզի՝ բոլորիդ, մեր ժողովուրդի բոլոր զաւակներուն անխտիր, Ազգային Երեսփոխանական ժողովի անդամներուն, Կրօնական եւ Ազգային Վարչութեան անդամներուն, Հոգեւոր Դասին, Ազգային Պատգամաւորներուն, Առաջնորդարանի բոլոր խորհուրդներուն եւ Յանձնախումբերուն, Եկեղեցիներու Հոգաբարձութիւններուն, եկեղեցիներու Դպրաց Դասերուն եւ Սարկաւազներուն, Հայ Յեղափոխական Դաշնակցութեան, Հ.Յ.Դ. «Հորիզոն» Շաբաթաթերթի Վարիչ Խմբագրին ու անձնակազմին, Հ.Յ.Դ. Երիտասարդական եւ Պատանեկան Միութիւններուն, Հայ Օգնութեան Միութեան, Հայ Մարմնակրթական Ընդհանուր Միութեան, Համազգային Հայ

Կրթական եւ Մշակութային Միութեան եւ բոլոր կազմակերպութիւններուն, Ազգային Վարժարաններու եւ Կիրակնօրեայ ու Շաբաթօրեայ դպրոցներու ուսուցչական կազմերուն եւ ուսանողութեան:

Ձեզի եւ Մեզի Մեծ Աւետիս՝
Քրիստոս Ծնաւ եւ Յայտնեցաւ:

ԲԱՒԳԷՆ ԱՐՔԵՊԻՍԿՈՊՈՍ
Առաջնորդ
Գանատայի Հայոց Թեմի

6 Յունուար 2017

ՏՆՕՐՀՆԷՔ

Տնօրհնէք փափաքող
ընտանիքները,
թող բարեհաճին դիմել
Տ. Գառնիկ
Աւ. Քինյ. Գոյունեանի,
հեռաձայնելով
514 909 5203 թիւին:

ՀԻՒԱՆԴԱԵՐՈՒ ԱՅԾԵԼՈՒԹԻՒՄ

Բարեհաճեցէք հեռաձայնել
Արժ. Տ. Գառնիկ
Աւ. Քինյ. Գոյունեանի.
514 909 5203 թիւին:

ՀՈԳԵՀԱՆԳԱՏԵԱՆ
ՁԵՐ ԱՐՁԱՆԱԳՐՈՒԹԻՒՄԻՆԵՐՈՒ
ՆԱԽՕՐՕՔ ԿԱՏԱՐԵՅԷ ԿՊՈՒՄԵԼՈՎ
ԵԿԵՂԵՅՈՂ ԴԻՒԱՆԱՏՈՒՄ: